




# رافض ليہ

تأليف

د / محمد العجوز



جمعة ونزيب

د / محمد العجوز .

دار النعيم  
للنشر والتوزيع

٠١٠٣٤١٨٧٨٤

## رافض ليه....؟؟؟؟!!!

يا ترى ياشباب ويا ترى يا بنات لوحد  
عرض عليك انك تاخد عربية مرسيدس .....!!!!  
طيب لوحد عرض عليك مليون وون جنيه!!!!  
طيب لوحد عرض عليك شقة اربع اوض  
وصالة متجهزة ومتشطبة .....!!!!

وانتي يا اختي لو حد عرض عليك مش  
١٠٠ جرام ذهب لأ كيلو ذهب .....!!!!

يا ترى ممكن ترفض .... وانتي  
ممكن ترفض ...

ويا ترى لو رفضت أول سؤال هتسمعه من الناس  
هيكون ايه ؟؟؟!!!!





## عرفت السعادة فين؟!؟

«السعادة انك تمشي في طريق ربنا... طريق الراحة والطمأنينة.

«**عرفت بقا انت رافض ليه؟!؟** مشيت في كل طرق المعصية علشان تبقى سعيد وللاسف، تركت الصلاة وقلت مش فاضي عشان دراستي ولا عشان شغلي ، ورفضت انك تكون سعيد !!!

«أخي...أختي... ربنا عرض عليك لو رجعتله يقبلك ويهديك ويتوب عليك "ومن يعمل سوءا أو يظلم نفسه ثم يستغفر الله يجد الله غفورا رحيمًا" **رافض ليه ....رافضة ليه؟!؟**

«عرض عليك لو اي مشكلة وقفت قدامك تقول يا رب ماليش غيرك وهو يحلهاك ..

رافض ليه ؟!

﴿ ربنا غرقك بنعمه "وان تعدوا نعمة الله لا تحصوها

رافض ترجعله ليه ؟!

﴿ ربنا عرض عليك الجنة اللي فيها ما لا عين رأت

ولا أذن سمعت ولا خطر على قلب بشر ....

رافض ليه ؟!

﴿ عرض عليك انك تتصل بيه سبحانه وتعالى

في كل يوم خمس مرات عن طريق الصلوات

الخمس عشان ينورك طريقك ويهديك ويشرح

صدرك ... رافض ليه !!

👉👉 أنا هكلمك في الكام صفحة دول عن  
أخطر حاجة في حياتي وحياتك..حاجة لو عملتها  
هيتيسر لك حاجات كتير اوي بعد كده ....

### رافض ليه نصلي.....ما بتصليش لبيبيه؟؟!

**أقولك :-** لو أنت بتبحث عن السعاده الحقيقيه  
والحب الحقيقي والراحه الحقيقيه واللذه الحقيقيه

#### يبقى مفيش غير الجنه

أيوه الجنه ....فيها مالا عين رأت ولا أذن سمعت  
ولا خطر على قلب بشر

#### أنت عارف أنا بكلم مين...؟

◀ أنا بكلمك أنت يا اللي ما بتصليش أصلاً....  
أوبتصلي فرض وتسيب فرض ....أوما بتصليش  
غير الجمعه....

#### افتحلي قلبك ....ومتز علش منى

لوشديت عليك شويه متز علش...علشان انا خايف  
عليك .....

## جریمه کبیره

﴿ ترك الصلاه... مش أمر بسيط زى ما أنت فاکر أنت عارف رسول الله ﷺ بيقول ايه....؟؟  
((العهد الذی بیننا وبينهم الصلاه... فمن ترکها فقد کفر))

## أنت بتحب ربنا...؟؟

﴿ هتقولی آه بحبه.... أنا طبعاً ما أقدرش أكذبك

## لو بتحب ربنا...!!

﴿ مش راضى تجيله ليبيبييه...؟؟  
﴿ مش عاوز تقرب له ليبيبييه...؟؟  
﴿ مش عاوز تسمع كلامه ليبيبييه...؟؟  
لو بتحب ربنا كنت وقفت بين ايديه.....؟؟

## أسأل نفسك.....

﴿ هو أنا صح مبصليش ليه؟؟ الناس اللي بتركع وتسجد أحسن مني في آيه؟؟ هو أنا مش مسلم

﴿ أنت عارف يا تارك الصلاه إن في ناس

كثير بتتمني تصلي بس كفار ..... الكفار بيحسدوه علي

الصلاه يا مسلم وانت مبتصليش!!!!

((ربما يود الذين كفرو لو كانوا مسلمين)) كثير من الناس اهدتوا للإسلام لما شافوا الناس بتصلي  
 < فيلسوف فرنساوي بيقول :- ((ما دخلت مسجدا قط دون أن يصيبني أسف محقق علي أنني لم أكن مسلما))

شفت بقي .. راجل مش مسلم بيقول كل ما بدخل مسجد وأشوف الناس بتصلي أزعل جدا من نفسي  
 أني مش مسلم ؟

وانت مسلم ورافض انك تدخل المسجد ورافض أنك تصلي !!

✎ واحد يهودي اسمه جاكى بيتقول : ( كان هناك سؤالاً يتردد في نفسي ويلح علي عقلي وهو لماذا لا أعتنق الإسلام كان هذا خاطر داخلي ويهزني من أعماقي كلما رأيت رجلاً متواضعاً من زارعي الأراضى يقف بين يدي الله مؤدياً صلاته في المصلي الصغير علي شاطئ الترعه فكنت أود لو

صليت مثلك صلاته وناجيت مثلك مناجاته ثم هداني الله للإسلام

ولكن بعد أن ضللت عنه الصلاة ٦٥ سنة } أسلم وعمره  
٦٥ سنة حيا في الصلاة ...!!

❗ أنت عارف أنا بقولك الكلام ده ليه ...؟؟؟

لأن اليهود والنصارى بيتمنوا الصلاة وأنت مسلم  
ومبتصلش فخايف ربنا يسألك منك نعمه الإسلام  
قبل موتك ...

أنت قلبك متحركش للصلاة بعد ده كله !!؟؟

الحق نفسك وتعالى صلي .....

أنت مبتصلش ليه ...؟؟؟!!

⌚ هتقولي مش فاضي أصلي ... والله أنا نفسي أصلي

بس مفيش وقت ...!!!

الله عز وجل أخبرنا أن المال خادم والدين مخدوم..  
قال رسول الله ﷺ قال الله عز وجل: إنا أنزلنا  
المال .....

لإقامة الصلاة وإيتاء الزكاة

عرفت ربنا إداك الفلوس ليه ؟؟؟

هتقول علشان بيحبيني ... طيب أنكسف علي نفسك !! هو

يحبك وانت ما بتحبهموش.. يعني ايه مش فاضي خايف  
تصلي أحسن الفلوس تروح...تنشغل بدنيتك عن  
صلاتك "بل تؤثرون الحياة الدنيا والأخره خير  
وأبقي " "إن هولا يحبون العاجله ويذرون  
وراءهم يوماً ثقيلاً"

### اطمن قلبك بكلام ربنا

◀ يقول الله تعالى في الحديث القدسي (( يا بن آدم  
تفرغ لعبادتي أملأ قلبك غناً وأسد فقرك وإن لم  
تفعل ملأت يديك شغلاً ولم أسد فقرك ))  
◀ الرزاق هو الله...اللي بيعطي الفلوس واللي  
بياخذ الفلوس هو الله ..

### ((العمل عباده))

◀ كلمه غريبه تسمعها من أي حد من خدام الدنيا  
....اللي الدنيا هي شغله الشاغل...عبادة إيه الي  
تلهي عن فريضة الله..؟؟!!!ديه عباده للشيطان !!  
ياللي بتنشغل بتجارتك وفلوسك عن ربنا...إنت  
كده عبد للفلوس. قال رسول الله ﷺ (تعس عبد

### الدرهم والدينار)

◀ تعيس عشان قلبه مش مستريح...تعيس عشان





والله أنا عاوز أصلي وبجب الصلاة بس كل ما آجي أصلي بحس إنها حاجه ثقيله عليا ... كل ما آجي أصلي ألاقى حاجه تحوشني  
 < ديه حاجه بسيطه خالص ... الصلاة مش ثقيله ولا حاجه . ولكن إنت لما خدمت الشيطان .. نظرت نظره حرام ... عاكست وحده وخلتها مشت في طريق الشيطان ... فلما تسببه وتروح لطريق ربنا يقولك تعالي رايح فيــــــــــــن ..؟؟ مش هسيبك بس خد بالك .....

< كل ما تقرب لربنا أكثر وتصدق معاه يقربك أكثر  
 مبتصليش ليه ؟؟؟!!!

!!! تقولي الناس الي بيصلوا كلهم حراميه ....

< يا عم خليك إنت القدوه وإثبتلهم إن إنت الأحسن ..... قولهم أدى الناس اللي بتصلي !!!

هتقولي أنا كل ما أصلي تحصلني مصيبه ...

< هقولك معلش ربنا بيختبر قوة إيمانك بيشوفك راجع ليه بجد ولأ عند أول مشكله هترجع تاني ربنا عاوز يسمع منك كلمة الحمد لله ....

❁ الصلاة دي مش مشكله أهم حاجه إن قلبك أبيض

ومابا ديش حد ..



﴿ أنت قرب من ربنا وبعدها هتحنس أن الله هو أرحم الراحمين .

﴿ لا بقي أنا الحمد لله مش بسبب فرض كله في البيت

والحمد لله...!!

﴿ طيب ..بيوت ربنا سبحانه وتعالى معمولة لمين ...المساجد معمولة عشان المسلمين يجتمعوا فيها ..وبعدين لا يجوز لك ان تصلي في البيت بغير عذر ..وانت كده مخالف لحبيبك النبي ﷺ شوف النبي بيقول إيه .." لقد هممت أن أمر فتيتي فيجمعوا لي حزما من حطب , ثم آتي قوما يصلون في بيوتهم ليست بهم علة فأحرقها عليهم"

شوفت النبي يحذرك إزاااي؟؟؟!!

﴿ ده حتي الأعمي ما ينفقش إنه يصلي في البيت ...

عن عمرو بن أم مكتوم رضي الله عنه قال : قلت يا رسول الله ، أنا ضرير شاسع الدار ( يعني بيتي بعيد ) ، ولي قائد لا يلايمني ( يعني ما بيوصلنيش ) ، فهل تجد لي رخصة أن أصلي في بيتي ؟ شوف النبي قاله إيه ..قال : أسمع النداء ؟ قال نعم ، قال : ما أجده لك

( رخصة ) حسن صحيح

﴿ يعني ما فيش حاجة اسمها هصلي في البيت أصل انا  
لسه جايّ من الشغل وتعبااان ..دا الاعمي ما ينفعش  
يصلي في البيت ... **وانت ربنا أعطاك الصلوة وعاوز تصلي**

**في البيت ..؟؟؟**

يا راجل انزل قابل ربنا في بيته ...!! مش أنت بتحب  
ربنا ..؟؟؟ ، خلاص صلي في المسجد .. !!

**فيـــــــــــــــــه الحب ..؟؟**

﴿ ده من الجفاء والقسوة إن انت تسمع منادي الله  
**حي علي الصلاة ....حي علي الفلاح**

وانت ولا في دماغك !!

**عيب أوي لما حبيبك ينادي عليك ... ومتجاوبهوش ...**

☑ شوف بقي الناس اللي بتحب ربنا ... وقلوبها

معلقة بالمساجد ... وحريصة أد آيه علي الصلاة

﴿ سعيد بن المسيب يقول " ما أذن المؤذن منذ ثلاثين

سنة إلا وأنا في المسجد "

ده مش مستتي لسه لما الأذان يأذن ... ولا استنتي لما

يقيم الصلاة ... أو يفوت ركعة وأنتين وثلاثة .. لا ده

قبل الأذان بيكون في المسجد ...

◀ أحد السلف يقول " إذا رايت الرجل يتهاون في

التكبيرة الأولى فاغسل يدك منه " دا التكبيرة الأولى

مش الصلاة كلها !!

### كن مثلهم ... !!

◀ أحد السلف كان إذا فاتته صلاة الجماعة ، صلي

تلك الصلاة ٢٥ مرة صلاة واحدة فاتته يعوضها ٢٥

مرة لأنه خسر ٢٥ درجة في جماعة ... شوف شدة

الحرص !!

### سؤال ؟؟؟

◀ ليه همتك عند الجنة ضعيفة... ؟؟ وعند الدنيا أنشط

ما تكون ... ؟؟

◀ ليه في الآخرة زاهد ... ؟؟

وفي الدنيا راغب ... ؟؟

◀ ده لو حد معاه معاد الساعة ٣ مثلا ، بيروح قبل

المعاد بنص ساعة ...

❖ انت مشتاق لربنا ولا مش مشتاق ..؟؟ جاوب علي

نفسك وهتعرف أنه مفيش حد بيحب ربنا بيصلي في

البيت .. وان الصلاة في البيت **خسرانه خسرانه ..**

شوف النبي ﷺ بيقول إيه " من سمع النداء فارغاً

صحيحاً فلم يُجب فلا صلاة له " حسن صحيح

ليبيبيه تضيع صلاتك ...؟؟!!

**دعوة للروقان ... دعوة لهدوء الأعصاب**

شوف ربنا سبحانه وتعالى بيقول إيه " **وَاسْتَعِينُوا**

**بِالصَّبْرِ وَالصَّلَاةِ** " البقرة ٤٥ .

❖ لو حسيت إنك **مخنوق** ... قوم صلي .

❖ لو حسيت إنك **مضايق** ... قوم صلي .

❖ لو حسيت **بالإكتئاب** ... قوم صلي .

❖ لو حسيت إن الدنيا **مقولة في وشك** ... قوم

صلي .



كان ﷺ إذا حزبه أمر ( استصعب عليه أمر ) فزع  
إلى الصلاة ... فوراً يذهب للصلاة .

شوف النبي بيقول إيه

”أرحنا بها يا بلال“

◀ شوف النبي بيقول إيه تاني ”جعلت قرة عيني في الصلاة“

◀ سعادتي وفرحي في الصلاة اااااااااااااااااااا

◀ وهل في سعادة أفضل و أجمل من أن يقف الإنسان

بين يدي من يحب ...؟؟!!!

◀ لو عندك مشكلة ... مين هيحطالك غير ربنا

سبحانه و تعالي ...؟؟!! طيب إزاي هتحلله علي

مشاكلك وانت أصلاً مش بتصلي ..!!

الصلاة مكانتها عظيمة جداً إيه ...؟؟!!

① الصلاة عماد الدين :

هل ينفع نبي عماره من غير عمدان ؟؟ بالتأكيد

لا كذلك الصلاة عمود من عمدان الإسلام ..

شوف النبي ﷺ بيقول إيه : " رأس الأمر الإسلام



وعموده الصلاة وذروة سنامة الجهاد في سبيل الله  
"حسنه الالباني .

لما انت بقي تكسر العمود ده بيقالك ايه من الإسلام  
؟؟.. **خد بالك دا مصيرك** !!..

**2 أول حاجة هتتحاسب عليها :** تخيل معايا لما شاب  
داخل الجامعة ونفسه لما يتخرج يشتغل في الشغلانة  
الفلانية والشغلانة دي معتمده علي التقدير ... هيبقي  
تركيزه علي التقدير اد ايه ...؟؟

وكذلك الصلاة أول حاجة هتتحاسب عليها ، **تركيزك**  
**وحفاظك عليها يبقى أد ايه ..؟؟**

شوف النبي بيقول ايه " أول ما يحاسب عليه العبد يوم  
القيامة : الصلاة ، فإن **صلحت صلح سائر عمله** ،  
وإن **فسدت فسدت سائر عمله** " وفي رواية ثانية للحديث  
" فإن **صلحت فقد أفلح** ، وإن **فسدت فقد خاب وخسر** "

صحيح

**3 آخر حاجة النبي وصي بيها أمته :** دا انت لو حد



① **تنهى عن الفحشاء والمنكر** ؛ قال الله تعالى: ﴿ ائْتِ مَا أَوْحَىٰ إِلَيْكَ مِنَ الْكِتَابِ وَأَقِمِ الصَّلَاةَ إِنَّ الصَّلَاةَ تَنْهَىٰ عَنِ الْفَحْشَاءِ وَالْمُنْكَرِ وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴾ العنكبوت، الآية: ٤٥ ..

◀ يعني الصلاة هتمنعك من معاصي كتيبيبيير !! مش نفسك تبطل سجائر ❌ وبص علي البنات ❌ ونفسك تبطل سماع أغاني 🎧 ، وانتني يا أختي نفسك تلبسي حجاب صح ..... يبقى لازم تحب وتحافظ علي الصلاة .. **بالله عليك منسيبش الصلاة**

② **أفضل الأعمال بعد الشهادتين** ﷺ؛ لحديث عبد الله بن مسعود قال: سألت رسول الله ﷺ: أي العمل أفضل؟ قال: ((الصلاة لوقتها)) قال: قلت: ثم أي؟ قال: ((برّ الوالدين)) قال: قلت: ثم أي؟ قال: ((الجهاد في سبيل الله)) . متفق عليه

③ **تغسل الخطايا** ﷺ؛ لحديث جابر رضي الله عنه قال: قال رسول الله ﷺ: ((مثل الصلوات الخمس كمثل نهر غمر على باب أحدكم يغتسل منه كل يوم خمس مرات)) مسلم .

◀ مش انت نفسك ربنا ينضفك من معاصيك وذنوبك؟؟  
 الصلاة بقي بتنضفك .... وأنا واثق إنك هتصلي عشاها  
 أنت بتحب ربنا وبتحب النبي ؟؟؟؟

④ **تكفر السيئات؛** لحديث أبي هريرة رضي الله عنه أن رسول الله ﷺ قال: ((الصلوات الخمس، والجمعة إلى الجمعة، ورمضان إلى رمضان مكفرات ما بينهن، إذا اجتنبت الكبائر)) مسلم.

◀ مش كل واحد فينا بيدنب وبيقع في معاصي ..  
 الصلاة بتمسح الذنوب أول بأول ...  
 يبقى ربنا بيعاملك بالرحمة ديه ومازالت رافض تصلي ؟؟؟!!!

⑤ **نور لصاحبها في الدنيا والآخرة؛** لحديث عبدالله ابن عمر رضي الله عنهما عن النبي ﷺ أنه ذكر الصلاة يوماً فقال: (من حافظ عليها كانت له نوراً وبرهاناً ونجاة يوم القيامة، ومن لم يحافظ عليها لم يكن له نور، ولا برهان ولا نجاة، وكان يوم القيامة مع قارون، وفرعون، وهامان، وأبي بن خلف) (رواه أحمد بإسناد جيد).

انت عارف ليه تتحشر مع الطواغيت دول بالذات ؟؟ لانك تركت الصلاة إما لمالك **ع** أو ملك **ع** أو رياستك ووزارتك أو تجارتك، فمن شغله **ماله** فهو مع قارون، ومن شغله **ملكه** فهو مع فرعون، ومن شغله **رياسته** ووزارته فهو مع هامان، ومن شغله عنها **تجارته** فهو مع أبي بن خلف

وفي حديث أبي مالك الأشعري **ع**: ((الصلاة نور)) مسلم , ولحديث بُريدة **ع** عن النبي **ص** أنه قال: ((بشر المشائين في الظلم إلى المساجد **بالنور التام يوم القيامة**)) صححه الألباني.

لأن الجزاء من جنس العمل... انت مشيت في الظلمة في الدنيا علشان الصلاة ربنا ينورلك يوم القيامة ..

**٥ يرفع الله بها الدرجات، ويحط بها الخطايا؛** لحديث ثوبان مولى رسول الله **ص** عن النبي **ص** أنه قال له: (( عليك بكثرة السجود، فإنك لا تسجد لله سجدة **إلا رفعك الله بها درجة، وحط عنك بها خطيئة**)) مسلم.

انت بقي عاوز تترفع أد ايه درجات في الجنة !!؟؟

⑦ من أعظم أسباب دخول الجنة برقة النبي ﷺ؛ لحديث ربيعة

بن كعب الأسلمي ؓ قال: كنت أبيت مع رسول الله ﷺ،  
فأتيته بوضوئه وحاجته، فقال لي: ((سَلِّ)) فقلت: أسألك  
مرافقتك في الجنة، قال: ((أو غير ذلك؟)) قلت: هو ذاك،  
قال: ((فاعني على نفسك بكثرة السجود)) مسلم

شوف همه انه يبقي مع النبي في الجنة... والجنة مش  
بالكلام لازم تطيع ربنا عشان تدخل الجنة... علوز الجنة  
خلاص اسجد لربنا كتييييييير ...

⑧ المشي إليها تكتب به الحسنات وترفع الدرجات وتحط

الخطايا؛ لحديث أبي هريرة ؓ قال: قال رسول الله ﷺ:  
((من تطهر في بيته، ثم مشى إلى بيت من بيوت الله؛  
ليقضي فريضة من فرائض الله، كانت خطواته أحداهما  
تحط خطيئة، والأخرى ترفع درجة)) مسلم.

كل خطوة بتمشيها لربنا , ربنا مش بيضيعها , يعني  
لو بيتك بعيد يبقي انت بتأخذ اجر أكثر من القريب ...



❖ وفي الحديث الآخر: ((إذا توضأ أحدكم فأحسن الوضوء، ثم خرج إلى المسجد، لم يرفع قدمه اليمنى إلا كتب الله ﷻ له **حسنة**، ولم يضع قدمه اليسرى إلا **حط الله ﷻ عنه سيئة**..)) أبو داود.

❖ عند ربنا الخطوة ليها ثمن ...

⑨ **تُعدُّ الضيافة في الجنة بها كلما غدا إليها المسلم أورا ح؛** الحديث  
أبي هريرة رضي الله عنه عن النبي ﷺ: (من غدا إلى المسجد أو راح، أعد الله له في الجنة نزلاً كلما غدا أو راح) متفق عليه  
❖ والنزل ما يهيأ للضيف عند قدومه. خد بالك دي ولانم من ولانم الجنة ، يعني ما لا عين رأت ولا أذن سمعت ولا خطر علي قلب بشر .. تصحيح الولا نم ديه **عشاه شوية كسل !!؟؟**

⑩ **يغفر الله بها الذنوب فيما بينها وبين الصلاة التي تليها؛**  
لحديث عثمان رضي الله عنه قال: سمعت رسول الله ﷺ يقول: ((لا ) يتوضأ رجل مسلم فيحسن الوضوء، فيصلي صلاة إلا **غفر الله له ما بينه وبين الصلاة التي تليها**)) مسلم.

**① ① تكفر ما قبلها من الذنوب؛** لحديث عثمان رضي الله عنه قال:

سمعت رسول الله ﷺ يقول: ((ما من امرئ مسلم تحضره صلاة مكتوبة، فيحسن وضوءها، وخشوعها، وركوعها إلا كانت **كفارة لما قبلها من الذنوب**، ما لم يأت كبيرة، وذلك الدهر كله)) مسلم،

**② ① تُصلي الملائكة على صاحبها ما دام في مُصلّاه،** وهو في

صلاة ما دامت الصلاة تحبسه؛ لحديث أبي هريرة رضي الله عنه

قال: قال رسول الله ﷺ: ((صلاة الرجل في جماعة

تزيد على صلاته في بيته وصلاته في سوقه **بضعاً**

**وعشرين درجة.** وذلك أن أحدهم إذا توضأ فأحسن

الوضوء ثم أتى المسجد، لا ينهزه إلا الصلاة (يعني

ما فيش حاجة بتحركه غير الصلاة)، لا يريد إلا

الصلاة، **فلم يخط خطوة إلا رفع له بها درجة، وخط**

**عنه بها خطيبة** حتى يدخل المسجد، فإذا دخل المسجد

**كان في الصلاة ما كانت الصلاة تحبسه، والملائكة**

**يُصلّون على أحدهم ما دام في مجلسه الذي صلى فيه،**

**يقولون: اللهم ارحمه، اللهم اغفر له، اللهم تب عليه،**

**ما لم يؤذ فيه، ما لم يحدث فيه))** متفق عليه. وكمان





**١٥ من سبق بها وهو من أهلها فله مثل أجر من حضرها؛**

لحديث أبي هريرة رضي الله عنه قال: قال النبي ﷺ: ((من توضأ فأحسن الوضوء، ثم راح فوجد الناس قد صلوا أعطاه الله ﷻ مثل أجر من صلاها وحضرها، لا ينقص ذلك من أجرهم شيئاً)) صححه الألباني.

**١٦ إذا تطهر وخرج إليها فهو في صلاة حتى**

**يرجع،** ويكتب له ذهابه ورجوعه؛ لحديث أبي هريرة رضي الله عنه قال: قال رسول الله ﷺ: ((إذا توضأ أحدكم في بيته، ثم أتى المسجد، كان في صلاة حتى يرجع))

**فيه عاقل يعرف ثواب قد كره ويفطر فيه ... علقاه دنيا لا تساوي عند الله جناح بعوضة**

**انت عارف تركك للعلة بيعك لإيه ... ؟؟**

**١ بتعرض نفسك لعذاب لقبر** ففي الحديث الذي أخرجه

البخاري عن الرؤيا لتي رآها رسول الله ، يقول :

((وإنا أتينا على رجل مضطجع، وإذا آخر قائم عليه

بصخرة، وإذا هو يهوي بالصخرة لرأسه فيتلغ رأسه

(يقسم رأسه نصفين) فيتددهه الحجر (الحجر يجري)،



③ **دخولك النار:** وما أدراك ما النار... يعني شعرة شعرة تتحرق.. يعني تشرب من الحميم والمهل الماء شديد الغليان.. طعامك نار وشرابك نار.. نهارك وليلك في الجحيم و العذاب ..

﴿ شوف ربنا بيقول إيه " إِلَّا أَصْحَابَ الْيَمِينِ فِي جَنَّاتٍ يَتَسَاءَلُونَ عَنِ الْمُجْرِمِينَ مَا سَلَكَكُمْ فِي سَقَرٍ قَالُوا لَمْ نَكُ مِنَ الْمُصَلِّينَ وَلَمْ نَكُ نُطْعِمِ الْمِسْكِينَ وَكُنَّا تَخَوِّضُ مَعَ الْخَائِضِينَ وَكُنَّا نُكَذِّبُ بِيَوْمِ الدِّينِ حَتَّى أَتَانَا الْيَقِينُ " [المدثر: ٣٩-٤٧]،

﴿ أهل الإيمان بيقولوا للمجرمين شوف الاسم " مجرم " إيه اللي دخلكم جهنم...؟؟ أول إجابة تكون **مكناش**

**بنصلي**... بالله عليك أنت تقدر تستحمل النار...؟؟!!

﴿ شوف ربنا بيقول إيه تاني " فَخَلَفَ مِنْ بَعدِهِمْ خَلْفٌ أَضَاعُوا الصَّلَاةَ وَاتَّبَعُوا الشَّهَوَاتِ فَسُوفَ يَلْقَوْنَ غِيًّا " [مريم: ٥٩] ، الغي اللي هو الخسران ، وعن كعب قال:

"غي واد في جهنم، أبعدھا قعرا واشدها حرا، فيه بنر  
يسمى البهيم، كلما خبت جهنم ( يعني اطفئت ) فتح الله  
تعالى تلك البنر تتسعر بها جهنم ( تشتعل من تاني ) ،"  
وقال ابن عباس: ( لغي واد في جهنم، وإن أودية  
جهنم لتستعيز من حره ). جهنم مش مستحمله من شدة  
حر الوادي ده ... أنت بقي هتقدر تستحمل ...!!!

**ليستعيز من حره نفسك؟؟؟**

قال تعالى " فَوَيْلٌ لِلْمُصَلِّينَ الَّذِينَ هُمْ عَنْ صَلَاتِهِمْ  
سَاهُونَ " [الماعون: ٤، ٥]

والويل معناه المشقة في العذاب، وقيل: إنه واد في جهنم  
بين جبلين يهوي فيه الهاوي أربعين خريفاً، .....  
يترمي عشان يجيب قاع الوادي يعد أربعين سنة ...  
وقيل: إنه واد يجري بفناء جهنم من صديد أهل  
النار ، وقيل غير ذلك.

انت عارف عن صلاتهم ساهون يعني ايه...؟؟؟!!

ده مش تارك الصلاة .. دا ده اللي بيجمع صلتين علي بعض ... يصلي الفجر قبل الظهر بشوية ، و الظهر مع العصر ، وهكذا ... عشان نايم أو مش فاضي ...

**فما بالك بتارك الصلاة ... ؟؟**

**ازاي تعيش الصلاة ... !!!**

**اجمل احسن ... !!!!**

✧ عيش معايا مع المشهد ده كويس أوي :

✧ النبي ﷺ كان طلع غزوة فأمر رجلين بالحراسة ، رجل من المهاجرين ورجل من الأنصار ... قام الأنصاري يقف بين يديّ الله ويصلي .. شافه أحد المشركين .. **فضربه بسهم** .. الصحابي نزع السهم **وكمّل صلاته** .. رماه بسهم ثاني .. نزعه وكمّل صلاته .. لغاية ما رماه بتلات سهام .. لكن بعد السهم الثالث ما قدرش يستحمل فركع وسجد .. المهاجري استيقظ .. المشرك لمّا عرف انهم حسوا بيه هرب



..فالمهاجري لمّا شاف الدم اللي بالأنصاري ..قال  
سبحان الله !! ألا نبهتني أول ما رمي ؟! كنت قولي من  
أول سهم لمّا ضربك بيه ...شوف رد الأنصاري كان  
أيه ؟؟ .. **كنت في سورة أقرأها فلم أحب أن أقطعها !!!!**

❖ ياااااااه ...من كتر لذته بالقراءة والصلاة...مش  
قادر يسيب الصلاة ...

❖ يبقى أنت لو المشاعر ديه دخلت قلبك ... استحالة  
انك تسيب الصلاة عشان شغلك أو محاضرتك أو أي  
حاجة تاني... **لأنك بتلذذ بالصلاة** ..اللي هتوصلك بإذن  
الله لو حسيت بيها لأعلي مشاعر الإيمان بإذن الله ...

❖ **يقول ابن الجوزي :**

"نحن في روضة طعامنا فيها **الخشوع** وشرابنا فيها  
الدموع "

**طعامنا وشرابنا الخشوع والبكاء ..!!**

النبي ﷺ يقول " أقرب ما يكون العبد من ربه وهو ساجد " بتقرب من ربنا أوي في السجود .. وديه قمة اللذه ...

دلوقتي أنا هكلمك عن خطوة خطوة ومشهد مشهد .. لو حسيته .. صلاتك هتتغير تماماً .. وهتدخل الصلاة مش هتبقى عاوز تطلع منها بإذن الله سبحانه وتعالى.

ركز معايا في كل كلمة ومتقفلش الكتيب لغاية م كمل كلامي معاك .. ومش عاوزك تزهق :

① **الرجاء :** تبقي طمعان في رحمة ربنا .. تبقي محتاج لربنا .. لما تقول يارب " أتيتك أرجو رحمتك ، أرجو مغفرتك ، يارب لو ذنوبي كتيره بس بس عفوك أعظم يارب "شوف ربنا بيقول إيه (( **ورحمتي وسعت كل شيء** )) ،

وربنا بيقول في الحديث القدسي " **أنا عند ظن عبدي بي** " ياتري أنت هتظن بربنا إيه ..؟؟!!





والأرض والجبال فأبين أن يحملنها وأشفقن منها  
وحملتها أنا .

\* تخاف من ذنوبك... كام معصية عصيت بها ربنا  
وستترك ..؟؟!! كام نعمة انعم بيها عليك ولم تؤدي  
شكرها ..؟؟!! **تخاف من ربنا لأنه عظيم..**

تخيل معايا .. لو ظابط مباحث أستدعى واحد في معاد  
معين .. هيروح هيبقى خايف ازاي ومرعوب ازاي ..  
ولله المثل الأعلى .

اسمع قول الله: **( ما لكم لا ترجون لله وقارا )** .. ليه ما  
بتعظموش ربنا ..؟؟!!!!

\* خاف إنه ممكن يدخلك ناره .. خاف من عقوبة  
معاصيك .. خاف إنه يغضب عليك!!!

**وادخل صلي بهذا الشعور وقول** : يا رب إله لم يلك بك سخط  
علي فلا أبالي وأكيد بإذن الله صلاتك هتتغير تماما بهذا  
الشعور ..

◀ شوف النبي كان بيدعوا ويقول ايه " اللهم لا ملجا ولا منجى منك إلا إليك " " اللهم اني أعوذ برضاك من سخطك وبمعافاتك من عقوبتك وبك منك لا أحصي ثناء عليك " ..  
اللي بيقول الكلام ده النبي الذي غفر له ما تقدم من ذنبه وشوف خايف من ربنا إزاي !!!

**طيب أنا وانت المفروض نخاف منه ربنا إزاي !!**

③ **الحب ♥** : شوف ابن القيم بيقول ايه عن هذا الشعور " هو الذي تنافس فيه المتنافسون وإليه شمر السابقون فهو غذاء الارواح وقرة العيون " متى خلا القلب منه فهو كالجسد الذي لا روح فيه " ◀  
انك تدخل الصلاة بشوق وحب لربنا سبحانه وتعالى .. زي ما قال أحد السلف " إلهي إن تعذبني فاني لك محب وان ترحمني فاني لك محب "

♥ أنا بحبك أوي يا رب !!!!

♥ تحب ربنا .. لإنعامه عليك ... ونعمه اللي انت

متغرق فيها قال تعالى "وإن تعدوا نعمة الله لا تحصوها"

♥ تحب ربنا .. لحسن تعامله معك ... يااه شوف كام

مرة بتتجراً على ربنا .. ورغم ذلك لم يفضحك

وستترك وأعطاك ولما رجعت ليه سبحانه مرفضكش..

◀ شوف النبي بيدعي ربنا بيقول إيه ... "وأسألك

الشوق إلى لقائك" انا مشتاقك أوي يا رب !!!

♥ تحب ربنا ... لان من أسمائه الجميل... جماله لا

يدركه سواء ولا يعلمه غيره ... فلا نشبه ربنا بصفاتنا

{ ليس كمثله شيء } و المخلوقات التي تراها دليل على

عظمته وجماله وجلاله سبحانه وتعالى ... شوف منظر

الجبال و البحار والأنهار والطيور والحيوانات..

الآن .. تأمل حديث الرسول صلى الله عليه وسلم إن

الله ينصب وجهه لوجه عبده في صلاته مالم يأنقث "

ياااه .. قوم صلي وقف بين يدي هذا الجمال بين  
يدي الله سبحانه وتعالى .. وشوف صلاتك هتتغير أد  
ايه ... !!

④ **الحياء** : إنك تنكسف من ربنا...

١ شوف أحد السلف بيقول إيه : " خاف الله على  
قدر قدرته عليك ، واستحي منه على قدر قربك منه  
شوف ابن القيم بيقول كلام غالي أوي : " تمكين  
الله لعبده من المعصية وستره عليه حتى يقضى  
وطره منها وحراسته له وهو يقضى وطره من  
معصيته والعبد يستعين على المعصية بنعم الله ثم  
بعد ان ينتهى بتركك فلا يغلم بك احد حتى يموت  
وهذا من اقوى الدواعى لمحبتة "

ربنا شافك وانت بتعصيه .. فسترك .. وحرسك  
... وانت بنعمه بتعصيه... بعد كده سابك ... وسترك  
ومحدث عرف بالمعصية اللي انت عملتها ... !!!  
عرفت ربنا عظيم .. رحيم ... ستير... أد إيه ؟؟

⑤ كلمه .. خا بيه .. تحدث إليه : ﴿ = أدبك مثال بسيط أكثر وقت الناس بتبكي فيه بيبقى إمتى يا ترى ؟؟ هتقولي في صلاة التراويح في رمضان ... فين بالتحديد ؟؟ ... وقت الدعاء ... تلاقي الناس بتبكي ومش بتتمالك نفسها ... أنت عارف ليه ؟؟

● لأن في الدعاء انت بتحس بحلاوة المناجاة ... قال ﴿ " إذا قام أحدكم يصلي فإنه يناجي ربه "

خلينا في الكلام العملي: يعني لما تستشعر وانت بتصلي وبتقرا الفاتحة " الحمد لله رب العالمين " .. الحمد ليك أنت يا رب أنت الذي أنعمت علي وأنت الذي أعطيتني "اياك نعبد " العبادة لك وحدك يا رب .. انت الذي تستحق العبادة " واياك نستعين " أعني يا رب .. خد يايدي يا رب ... أيوه كلم ربنا وناجيه ... حتي لا يكون الحديث من طرف واحد !!

← أحد السلف لما كان يجي يصلي قيام الليل يهز لحيته ويقول: يا رب عبدك هذا في الجنة أم في النار "

◀ كلم ربنا.. قوله يا رب انت راضي عني يا رب ..  
قوله ماليش غيرك يا رب... متسبنيش يا رب...  
محتاج لك يا رب..

◀ لو خليت صلاتك كلها مناجاة .. في القراءة  
والركوع والسجود.. صلاتك هيبقى ليها طعم ثاني...  
واسيبك تجرب طعم المناجاة..

🌸 استشعر كل كلمة .. حس بكل كلمة... متخليش  
صلاتك زي اللي حافظ حاجة ورتم واحد بيسمعه  
وخلص .

◀ هو ده السر ... إنك عشان تخشع في الصلاة لازم  
تعرف إن صلاتك بلا خشوع تعب بلا حسنات !!!

إزاي؟؟ .. النبي صلى الله عليه وسلم ذكر أن العبد  
ليصلي الصلاة ما يكتب له منها إلا تسعها ثمنها سُبْعُهَا  
سُدْسُهَا خُمُسُهَا رُبْعُهَا ثُلُثُهَا نِصْفُهَا ،،

**على قدر خشوعك .. على قدر الأجر**



❖ يعني خشعت ثلاث ركعات .. تاخذ أجر ٣ ركعات ، ركعتين تاخذ ركعتين ، واحدة تاخذ واحدة ... **وإن لم تخشع خاف ألا يكتب لك اجرا.. !!**

❖ **يعني الصلاة باطلة؟؟!!** لا مش باطلة ولا حاجة بس المسألة مسألة حسنات..

❖ **هتقولي طالما الأمر كدة نترك الصلاة أحسن**

❖ تخيل معايا واحد وهو ماشي في الشارع "الجزمة" اللي في رجله اليمين انقطعت ... راح قالك خلاص.. اقطع الثانية بالمرة.. تقول عليه ايه...؟؟

❖ يبقى تحاول تخشع مش تسبب الصلاة؟؟!! تدخل الصلاة تشعرك إنك بتكلم ربنا بكامل صفاته.

❖ **الاذان** : الصلاة مش بتبدأ مع تكبيرة الاحرام وبس .. الاذان ده كنز من الكنوز وفي ناس كتير لم تذوق هذه الاسرار الموجودة بالاذان....

**ازاي نشعر بالاذان؟؟**

(١) الاذان بيطرد الشيطان (٢) الاذان فرصة لمضاعفة الحسنات  
 دلوقتي أنا عاوزك تعيش معايا مع كل كلمة من الاذان  
 وتستشعرها بقلبك ...

**الله اكبر** يعني الله أكبر من كل حاجة .... أكبر من  
 تجارتك .. أكبر من مذاكرتك .. أكبر من أبنائك ...  
 أكبر من تجارتك فتسيبها وتذهب للصلاة .. أكبر من  
 نومك فسيب السرير وتقوم تصلي. **فلو حسيت إن الله**

أكبر عمرك ما هترك الصلاة!!

**اشهد أن لا إله إلا الله** : إيه اللي خلاك تترك المتع  
 والملاذات والتجارة والمذاكرة اللي أنت فيها؟  
 السبب انه لا إله إلا الله .. يعني لا أحد يستحق

العبادة إلا الله

لأن اللي بيترك الصلاة ومش عاوز يسيب عمله هو  
 في الحقيقة بيعبد وظيفته أو دكانه (تعس عبد درهم

والدينار)

أشهد أن لا إله إلا الله : سؤال ... انت بتصلي

لوحذك كده وبس ... ولا انت بتصلي اتباعا للنبي الذي قال " صلوا كما رأيتموني أصلي "

**لأنه في شرطين لقبول العمل :**

(١) الإخلاص .... يبقى عملك لله.

(٢) المتابعة .. تفعل كما فعل النبي صلى الله عليه وسلم.

**حي على الصلاة :** وانت بتقول **لا حول ولا قوة الا بالله ..**

يعني المؤذن ينادي للصلاة يارب ... وأنا بستعين بقوتك إنك تعيني أني أقوم أصلي ... لأنك مش هتصلي ومش هتخشع إلا إذا أعانك الله.

**حي على الفلاح :** المفروض أول ما تسمع حي على

الفلاح **تفرح ...** يعني الصلاة هي فلاحى ، الصلاة هي نجاتي .. تقول يا رب .... أنت تنادينى للفلاح ...

**خلاص أنا لازم أجيب النداء.**



انت عارف ... أنا وانت ذلك الرجل المسجون هنقف بين ايد ربنا سبحانه وتعالى .. هيسألنا سؤال واحد لو جاوبنا عليه , اللي بعده هيبقى أسهل ولو مجاوبناش المسألة هتبقى مش سهلة..

\*شوف النبي ( صلى الله عليه وسلم) بيقول ايه : " أول ما يجاسب عليه العبد يوم القيامة الصلاة ، فان صلحت صلح سائر عمله ، وان فسدت فسد سائر عمله"

فلازم تستعد كويس أوي للسؤال ده ...

**8الوضوء :-** يا خسارة !! كل يوم بتتوضى وأنت مش حاسس بطعم للوضوء... أول حاجة ممكن تغيرها في وضوءك مقدار الأجر والثواب اللي انت هتاخده....

**هتقولي :** أنا بتوضى وأقول أذكركم الوضوء بعمل كل المستحبات... كلام جميل و لكن **قلبك فين؟**

نيتك ايه وانت رايح تتوضى؟؟!!

﴿ هتقولى بتوضى عشان أصلي ... وده اللي بيعمله  
كثير من الناس للأسف... ﴾

**خد بالك :** كل ما تتوي نيات أكثر..تاخذ اجر أكبر .

﴿ يعني أنا هتوضى عشان ربنا أمرني بالوضوء  
وعشان أعرف أصلى وهتوضى إتباعا للنبي ﷺ....  
هتوضى عشان ربنا يكفر عني سيئاتي ... ﴾

\* شوف عبد الله بن المبارك بيكلمنا عن أهمية النية  
فيقول إيه:-- وكم من عمل قليل عظمتة النية وكم من  
عمل عظيم حقرتة النية "

**خد بالك :** الوضوء ده مقدمة الدخول على ربنا سبحانه  
وتعالى.... فانت بتتوضى عشان تدخل على ربنا  
نضيف.... نظفت بدنك وقلبك بالوضوء

﴿ عيش بقلبك في الحديث ده.. قال رسول الله ﷺ " من  
توضأ فأحسن الوضوء خرجت خطاياه من  
جسده . حتى تخرج من تحت أظفاره " ﴾

﴿ خد بالك ...الذنوب بتخرج من عضو عضو ... ﴾

قال رسول الله ﷺ: " إن العبد إذا دعا بوضوء فغسل وجهه؛ **حَطَّ الله عنه كل خطيئة أصابها بوجهه، فاذا غسل ذراعيه، كان كذلك، وإذا طهر قدميه، كان كذلك** " .

رواه أحمد وصححه الألباني

أنا عاوزك وانت بتتوضى تتأمل خروج الذنوب مع الماء وكأنك شايفها بعينك وانت تحسن ظنك ببرك **شوف الحديث الجميل ده ....**

قال رسول الله ﷺ " **إلا أدلكم على ما يمحوا الله به الخطايا ويرفع الله به الدرجات إسباغ الوضوء على المكاره (( يعني تتوضى والماء ساقعة مثلا والجو برد - ده يكفر الخطايا ))** ويكثر الخطا إلي المساجد فذلكم

الرباط "

**واحد يقول:** طالما الوضوء والصلاة بتكفر الخطايا والذنوب ، أنا أعمل اللي أنا عاوزه بعد كده أتوضى وأصلي.....

٧ .... انت كده بتتأخر ربنا سبحانه وتعالى..



ربنا أعطاك رحمته متقابلهاش أنت بالمكر.... لانك لو

مكرت بالله ... ربنا هيمكر بيبك

❖ شوف ربنا بيقول ايه " ويمكرون ويمكر الله والله خير الماكرين"

❖ أنت هتضحك وهتخادع مين ???

**انت عارف ربنا يمكر بيبك ازاي؟**

❖ لا يعطيك فضل الموضوع .. لان ربنا عارف سرنا وعلاانيتك واللي يتعامل مع ربنا بهذه الطريقة لا يستحق هذا الفضل...

⑨ **السؤال:** وانت بتستخدم السواك ... انت بتتصف وبتطهر فمك ... عشان لما تيجي تقف بين ايد ربنا تبقى مستعد وفمك طاهر ..

⑩ **غير نظرتك عن الصلاة:-** قول لنفسك هو أنا بصلي ليه

؟؟ عشان فرض وخلص ؟ .. لا ... ديه نظرة

ناقصة ... أنت بتصلي عشان الصلاة لذة وراحة....

صلي عشان انت **بتحب الصلاة..** مش عشان تنتهي

من الصلاة .. مش بتصلي عشان تؤدي واجب .. اللي يتعامل مع الصلاة بالمنظر ده ، الصلاة هتبقى ثقيلة عليه ومش هيحس ليها بطعم ... ومش طايق يعد في المسجد ... ولو الامام زاد آية ولا آيتين يبقى بيغلي ومتعصب ... مش كده ولا ايه...؟؟!!

## أنا عاوزك تشتاق للصلاة

◀ شوف أحد السلف بيقول إيه " ما جاء وقت الصلاة

إلا وأنا لها بالأسواق"

انت بتبقى مشتاق للصلاة ولا...؟؟

\* يعني ما ينفعش تدخل مع الإقامة جري جري

وتقول عاوز أخشع...!!

\* استعد مع الاذان ... متستناش الإقامة ..

وتوضئ لكل صلاة حتى لو كنت على وضوء ...

عشان وجهك ينور وتغفر ذنوبك...

\* اول ما تدخل المسجد .... صلي ركعتين تستعد

بيهم ... بحفظ غير اللي انت حفظه من القرآن

\* اجلس في المسجد وأقرأ شيء من القرآن استعدادا  
للدخول في الصلاة ..

◀ قبل ما تدخل الصلاة أسأل نفسك شوية أسئلة

... قول لنفسك أنا دلوقتي

لبست لبسي واستقبلت القبلة ايه اللي هيحصل كمان

شوية ..؟؟ أنا هقابل مين؟؟ هكلم مين؟؟ هقف بين ايد

مين ..؟؟ اقلل محمولك لإنك مش عاوز حد يعطلك عن

اللذة اللي انت هتدخلها...

◀ لو المشاعر دي دخلت قلبك هطير من الفرحة وانت

بتصلي

◀ دلوقتي أنا هخدك للبداية الحقيقية للقاء الله اللي

هنتقلك فعلا من حال إالي حال ومن عالم إالي عالم ..

**تكبيرة الإحرام :**

خد بالك مافيش أي ألفاظ قبل تكبيرة الاحرام زي سمعنا

وأطعنا واللهم أحسن وقوفنا بين يديك ومفيش تلفظ بالنية

**لييسيه بنبدأ بالتكبير ...؟؟؟!!**



رفع الأيد يعني الإستسلام .. يعني سلمت نفس ليك  
يارب ، رميت الدنيا ورا ظهري يارب ، وبرفع ايدي  
استسلاماً ليك أنت وحدك يارب ..  
خد بالك .. أنت أول ما بتقول الله اكبر بتحصل

حوالك تغيرات رهية ... إيه هي يا تري ؟؟؟

شوف النبي ﷺ يقول إيه " إن العبد ( لازم تعرف  
إنك عبد ) إذا قام يصلي أتي بذنوبه كلها فوضعت علي  
رأسه وعاتقيه (كتفيه) فكلما ركع أو سجد تساقطت عنه )  
يعني طول ما انت بتركع وتسجد ذنوبك بتقع من عليك  
تاني حاجه .. ينصب الله وجهه لوجهك ... ياااااااااه

شوفت معاني جميلة انااااااااااا !!!

انت دلوقتي بين إيد الملك أوعي تلتفت ...  
في أثر من الآثار أن العبد إذا التفت في صلاته بقلبه  
أو ببصره قال الله له " إني خير مني .. إني خير مني " .. لا والله  
يارب لا يوجد خير منك ، سبحانه ما عبدناك حق  
عبادتك ... !!!

يقي انااااااااااا تلتفت عه ربنا وتسجد في صلاتك ... انا  
المفروض ننكسف من ربنا ..

**\* وأنت في الصلاة قف مطأاً بالبراس ... خليك منكسر**  
 ذليل خاضع لله ، وانظر إلي موضع السجود .. وديه  
 علامة من علامات الحب لمن تحب ..

### دعاء الإستفتاح :

﴿ هو تحية ملك الملوك .. اللي بيدخل علي ملك من ملوك  
 الدنيا أول حاجة يحيه .. مش كده ولا إيه .!!؟! والله المثل  
 الأعلى .. مش هينفع تدخل علي ربنا بالذنوب بتاعتك  
 والبلاوي الزرقا ديه غير لما تعترف لربنا بخطأك ..

﴿X﴾ شوف دعاء الإستفتاح وتأمل معانيه " اللهم

باعد بيني وبين خطاياي كما باعدت بين المشرق  
 والمغرب ؛ اللهم نقني من خطاياي كما ينقى الثوب  
 الأبيض من الدنس ؛ اللهم اغسلني بالماء  
 والثلج والبر " انت بتقول يارب نضفني من اللي أنا  
 فيه .. ليه بنقول أعوذ بالله من الشيطان الرجيم قبل

### القراءة؟؟؟!

﴿ لأن الشيطان مش عاوز يسبيك في حالك وأنت  
 واقف بين إيد ربنا .. الحل للمشكلة الفلانية مش بيجيلك  
 غير وانت بتصلي ... لغاية ما تخرج من الصلاة من

غير أي استفاده .. فأنت بتقول يارب ألجأ إليك عشان  
تحميني من الشيطان .. **شوف بقي أنت اللي هتغلب الشيطان**  
**و لا هو اللي هتغلبك ..؟؟!!**

**بسم الله الرحمن الرحيم**

نبدأ ببسم الله وننتهي ببسم الله .. قبل أي عمل تقول بسم  
الله .. اسم الله أحلي مايكون علي قلوب المؤمنين ..  
**الحمد لله رب العالمين :**

**الحمد :** اثبات الكمال لله مع المحبة ... ربنا أحق من  
يُعبد ويُحمد

**الرب :** هو الرازق المالك المدبر .. يقال رب الأسرة ؛  
أي هو الذي يعيها ويصرف عليها

**العالمين :** جمع عالم وهو كل ماسوي الله سبحانه وتعالى  
.. يعني عالم الجن والإنس والبكتيريا والحشرات  
والخلايا

أنت بتقول الحمد لله رب العالمين والله يرد عليك  
ويقول **( حمدي عبدي )** معني رائع لو حسيته بقلبك  
**الرحمن الرحيم :**



إليه جت بعد ( الحمد لله رب العالمين ) لأن ربوبية الله سبحانه وتعالى مبنية علي الرحمة الواسعة للخلق ..

### مالك يوم الدين :

ربنا قَدِّم ( الرحمن الرحيم ) علي ( مالك يوم الدين ) .. لأن اليوم ده يوم شديد اللي ربنا وصفه انه تشخص فيه الأبصار وتضع كل ذات حمل حملها .. فربنا بيقولك مالك هذا اليوم الشديد هو الرحمن الرحيم ..

### ازاي تنجوا من شدة يوم القيامة ... ؟؟؟!!

### ( إياك نعبد وإياك نستعين ) :

هي دي النجاة .. إنك تعبد الله وتسعين به سبحانه ... !!  
يعني مش هعبد غيرك يارب .. ومش هستعين بغيرك يارب

يعني أوعي تقول ( إياك نعبد ) وانت في الحقيقة بتعبد المحلات والشهادات والفلوس وانت بتعبد الموضة والمكياج .. وقلبك فيهم ..!!!!!!

وأوعي تقول ( إياك نستعين ) .. وانت بتفكر في فلان باشا والمدير الفلاني .. **خلي قلبك كله لله ... !!**

لما تحس انك ملكش غير ربنا .. لما تحسي إنك ملكيش غير ربنا .. قوله مليش غيرك يارب ، محتاجلك يارب ... جميل أوي الإحساس بالذل لله ... لو حسيت بالآية دي بالذات هتبكي وأنت بتصلي !!

### اهدنا الصراط المستقيم:

أنت بتسأل ربنا أنه يهديك لطاعته... وانت بتقولها  
تفتكر صراط الآخرة.. اللي هو أدق من الشعرة وأحد  
من السيف. فمحدث هينجيك غير ربنا سبحانه وتعالى  
!!!!

### صراط الذين أنعمت عليهم :

أنت محتاج يكون حد معاك في طريق الهداية ، فربنا  
بيذكرك بالذين أنعم الله عليهم من النبيين والصديقين و  
الشهداء و الصالحين .. علشان تستحمل أي حاجة عشان  
ربنا زي ما هما استحملوا !!!

### غير المغضوب عليهم و الضالين :

المغضوب عليهم : هم يعرفون الحق ولا يفعلونه ..

ولا الضالين : يعملون ولكن بلا علم .. ومحدث هيضل

غير بأمر من الأمرين فأنت بتطلب من ربنا انه يبعدك  
عن هذا الضلال ..

### بعد قراءة الفاتحة :

اقرأ شئ من كتاب الله ، واخشع وتدبر وكرر الآية أكثر  
من مرة لغاية ما قلبك يشرب الآية ، وكتيبيير من  
السلف كان بيكرر الآية في ليلة كاملة من شدة تأمله  
لهذه الآية ... !!!

## الركوع :

بتقول " سبحان ربي العظيم " ، **التسبيح** معناه التنزيه يعني تبعد الله عما لا يليق به ، انت بتقول ( ربي ) لان فيها مشاعر القرب من الله ، والركوع فيه تذلل شديد واستشعر كلمة ( ربي ) ، ربي هو اللي اعطاني ورباني وكفاني وهداني ، وظهرك في الركوع منحني وخاضع لله .

❖ زي ما النبي قال " أما الركوع فعظموا فيه الرب " وانت راکع طول في الركوع  
❖ قال أحد السلف " ركع الزبير يوماً ركعة قرأت فيها وهو راکع البقرة وآل عمران والنساء والمائدة وما رفع رأسه ".....لانه يقيناً حاسس !!

## الرفع من الركوع :

سمع الله لمن حمده وتضع إيدك علي صدرك ، ولو كنت مأموم هتقول " ربنا ولك الحمد "

❖ **الحمد :** وصف المحمود وهو الله بالكمال مع المحبة والتعظيم ، استشعر المعني ده بقلبك !!

❖ **سمع الله لمن حمده :** أي استجاب الله للذي يحمده ،

وده مقدمة وثناء علي الله قبل السجود اللي هو اكبر مواضع استجابة الدعاء .

### غنيمة السجود :

تسجد وانت متذلل لله وتقول " سبحان ربي الأعلى " أو " سبحان ربي الأعلى وبحمده "

شوف الدعاء الجميل ده في السجود اللي كله ذل و انكسار . اللهم لك سجدت وبك آمنت ولك أسلمت ، سجد وجهي للذي خلقه وصوره وشق سمعه وبصره تبارك الله أحسن الخالقين "

وخذ بالك .. التنويع في الأذكار و الأدعية بيخليك تتلذذ أكثر ... وانت في السجود بتدي ربنا أعلى حاجه في جسدك وهي الجبهه بتنزلها علي التراب وده كمال الذل لله ... !!!

الجلسة بين السجدين : تقول اللهم اغفر لي

... لانك محتاج ان ربنا يغفرلك ..

قال ابن القيم رحمه الله : " شرع له بين

الخشوعيين اي السجدين أن يجلس جلسة العبيد

ويسأل الله ان يغفر له ويرحمه ويرزقه ويهديه "

## الجلسة النهائية :

خلاص احنا اقتربنا من نهاية اللقاء بين العبد  
وبين ربه سبحانه وتعالى .. خلاص احنا بننهى  
قرة العيون والطريق إلى اللذة والراحة والسعادة  
بعد اللي عرفته ده كله .. ياتري هيجيلك قلب تخرج من

## الصلاة ١١٩٩٩

◀ هعيش معاك مع اللحظات الأخيرة من الوقوف بين  
يديّ الله ... ياتري ازاى هنختم صلاتنا .. هنختم بهذا  
الكلمات الرائعة .. فكر فيها بقلبك .. " التحيات لله  
والصلوات والطيبات لله ، السلام عليك أيها النبي ورحمة  
الله وبركاته ، السلام علينا وعلى عباد الله الصالحين أشهد أن  
لا إله إلا الله وأشهد أن محمدا عبده ورسوله "

◀ التحيات يعني التعظيم لله ، والطيبات من أفعال  
العباد ... كله ليك انت يارب ، بعد كده انا عاوزك  
تتخيل انك واقف قدام النبي ﷺ وبتقوله السلام عليك

أيها النبي ورحمة الله وبركاته ، فرحك هيبقي عامل  
ازاي وانت واقف قدام النبي !!!!..

وبعد كده تبدأ تصلي علي حبيبك النبي ﷺ اللهم  
علي محمد وعلي آل محمد كما صليت علي ابراهيم وآل  
إبراهيم ، وبارك علي محمد وعلي آل محمد كما  
باركت علي ابراهيم وآل ابراهيم إنك حميد مجيد

علي قدر معرفتك لاسرار الصلاة والثامل في  
معانيها يقينا صلاتك هتتغير كئيبيبيبير جدا

مثال بسيط جدا ...

❖ لاعب الكورة وهو في الملعب بيفضل يجري ٩٠  
دقيقة ورغم ذلك مستمتع ... عارفين ليه ???  
لانه متلذذ ... وممكن تلاقيه مايستحملش يقف بعربيته ٥  
دقايق عشان يتسوق مثلا ... يعني ال ٥ دقايق عشان مش  
مستمتع بيهم بقوا نقال عليه عشان مش حاسس بيهم ولا  
متلذذ بيهم ... عرفت السر فيبيبيبين !!!!..

## بداية الطريق...؟؟؟؟!!!

بداية طريق الجنة هو الصلاة .... بداية طريق

حب الله هو الصلاة ... بداية طريق التغيير هو الصلاة

..لنفسك تتغير..لنفسك تتغيري البداية هي الصلاة

انت عارف حط رجلك بس في سكة الصلاة وانت

بعد كده هتنتلق لربنا وهتحفظ قرآن وهتبطل أي

حاجة بتعملها بتغضب ربنا بإذن الله سبحانه وتعالى ..

## !!!! يلا يا جماعة نتفسير ..

!!!! مستني ايه بعد اللي قرينه ده كله...الكتيب ده

هيبقي حجه عليك يوم القيامة...يلا انطلق بقي لربنا

ومتستاش ، ده الموت بيجي فجأة وثق ان سكة ربنا

هي طريق الراحة .. وانت ياأختي خدي قرار إنك

تغيري صلاتك وسعتها هتحسي بلذة القرب من ربنا

فعمرك ما هتترددي لحظة إنك تلبس حجاب صح



يخدك الجنة .. بعد قراية الكتيب قوم صلي ركعتين

توبة و استغفار بكل المشاعر اللي كلمتك عنها ..

يا جماعة شعارنا لازم يكون

"أنا ممكنة أخسر كل حاجة إلا أنت يارب"

دعوة للتواصل ..

بإذن الله بعد ما ربنا يمه عليك بالصلاة .. وأنا واثق بإذن الله إنك لو

مكنتش بتصلي وبعد ما قرنت كلام ربنا وكلام حبيبك النبي إنك كتبت خدت

قرار إنك حمرك ما هتسيب الصلاة أبدا . أو كنت بتصلي بس مش حاسس

بأي معنى للصلاة وبعد ما عرفت مكانة الصلاة وكنوز الصلاة والتلذذ

بالصلاة ثقتي في ربنا إنك هتبدأ تحب الصلاة بجد ...

اتصل علي الرقم الموجود خارج الكتيب ونسعد اننا نعرف انك اتغيرت و

انتي اتغيرتي وبإذن الله نتقابل في الجنة ، ولاتنسوني بدعوة صادقة بظهر

الغيب .

من اول صفحة ٨ حتي أول صفحة ١٥ ... بتصرف يسير  
من محاضرة " لماذا لا تصلي " للشيخ محمد حسين يعقوب  
مع بعض الإضافات .